



## zyt isch do

zyt isch do  
zyt isch do  
zyt isch vorhande – nimm dr ou drvo  
zyt isch öppis won es hütt  
- ganz im gägesatz zu re bi üs wytverbreitete meinig -  
immer no gratis git  
nimm dr zyt  
nimm dr zyt  
nimm dr zyt fang öppis a drmit  
nimm dr zyt  
nimm dr zyt  
nimm dr zyt s isch dyni zyt

e frou wo wartet e fründ wo wartet  
es chind wo wartet - uf di  
si wei nid dys gält nid dy schaffensenergie  
nid dy prueflech erfolg - si wei di  
wei di dyni rue u dy körper drzue  
wei zäme mit dir öppis sy  
si bruuche dyni zyt drum nimm dr di zyt  
si ghört dir u du teilsch sen y  
si ghört dir u du teilsch sen y

dä schpruch zyt sygi gäut isch so lang richtig  
wi mir di zyt em arbeitgäber gäbe  
hingäge schtimmt er nid u das isch wichtig  
we mir is eifach zyt näh u se läbe

zweni zyt u zviu lüt  
das sy d übu vo hütt

zyt isch do  
zyt isch do  
zyt isch vorhande nimm dr ou drvo  
mach doch nid sövu zyt zu gäut  
denn ganz im gägesatz zu re bi üs wytverbreitete meinig  
bruuchschr gar nid so viu gäut

aber zyt  
aber zyt  
aber zyt dänk mau was d mache chönntsch drmit  
mach emau es haub jahr blau  
nimm dr zyt fang a drmit – u zwar no hütt

*mach ferien in tunix - statt in tunesien!*

was hätt sch drvo wes i dym nachruef mau hiess  
dys läbe syg mühe und arbeit gsy  
u di angehörige straaute no schtouz  
schtatt deprimiert u hässig z sy  
säg was hätt sch? – dyni rue u dy guet ruf drzue  
dyni frou hätt dys biud u dys gäut  
u wüu si dyr läbtig nüt anders hätt gha  
merkti si nid emau was re fääut  
merkti si nid emau was re fääut

*die lücke die wir hinterlassen ersetzt uns vollkommen*

d usbütig vo däm rohschtoff wo dir gschänkt isch  
wo zyt heisst u wi d weisch nid unbeschränkt isch  
si isch dys läbesgschäft - u dr profit  
i form vo gläbter zyt ghört dir u dyne lüt

*lieber mit luscht e papi weder us fruscht e schtapi!*

zyt isch do  
zyt isch do  
zyt isch vorhande  
nimm dr ou drvo  
tue doch mau dä muetig schritt  
u mach das vrschissene wettrenne i dr schpirale vo konsum u leischtig  
ganz eifach nümme mit  
nimm dr zyt  
nimm dr zyt  
nimm dr zyt für di u dyner lüt  
mach doch mit  
hesch no zyt  
hingedry wettsch o du de gschyder sy - aber das nützt nüt

(1980)

Erstveröffentlichung: LP *Improvokazione* (1983)